

Visoki predstavnik se sastao s predsjednikom i ministricom vanjskih i evropskih poslova Republike Hrvatske



Visoki predstavnik Valentin Inzko danas se u Zagrebu sastao s predsjednikom Republike Hrvatske Ivom Josipovićem, zamjenikom premijera Nevenom Mimicom i ministricom vanjskih i evropskih poslova Vesnom Pusić.

Tokom ovih razgovora visoki predstavnik je prezentirao političku situaciju u Bosni i Hercegovini nakon formiranja Vijeća ministara sa Vjekoslavom Bevandom na čelu i naglasio novi duh optimizma koji su on i ostali ministri donijeli svojim jasnim namjerama da program članstva u EU i NATO-u i ekonomska pitanja smatraju vrhunskim prioritetom.

Visoki predstavnik se u ovim razgovorima također fokusirao na program implementacije Dejtona i posebno je zahvalio predsjedniku Josipoviću za suštinsku ulogu koju je Hrvatska igrala u stvaranju nove regionalne arhitekture i njen doprinos stvaranju najbolje atmosfere u regiji u posljednjih 20 godina.

Visoki predstavnik je pozdravio dogovor šest stranačkih lidera, postignut 9. marta u Banjoj Luci, o pitanjima državne i vojne imovine i izrazio nadu da će uskoro uslijediti njegova provedba. „Politički dogovor sada treba pretvoriti u konkretne aktivnosti u Parlamentu. Rješavanje pitanja vojne imovine

također će pomoći u postizanju daljnjeg napretka za sudjelovanje BiH u Akcionom planu za stjecanje članstva u NATO-u (MAP).“

Visoki predstavnik je izrazio svoj stav da Hrvatska može služiti kao pozitivan primjer Bosni i Hercegovini u njenim evroatlantskim aspiracijama. “Vjerujem da novi osjećaj svrhe koji je rezultat formiranja Vijeća ministara, zajedno sa primjerom Hrvatske kako se može napredovati na evroatlantskom putu, može dovesti do brzog napretka u vezi s drugim neriješenim pitanjima koja stoje pred BiH i njenim rukovodstvom”, rekao je Inzko, zahvalivši sugovornicima na konstruktivnoj ulozi koju Hrvatska i dalje igra u BiH, i kao supotpisnica Dejtonskog mirovnog sporazuma i kao buduća članica Evropske unije.

Sastanci u Zagrebu visokom predstavniku također su pružili priliku da razgovara o nekim aspektima praktične saradnje između Hrvatske i BiH u oblasti ekonomije u svjetlu priključivanja Hrvatske Evropskoj uniji sljedeće godine.

Galerija fotografija: